

## Avends an de Regentünn

Daar geev dat eens en Musekatt,  
de hett dat geern kommodig hatt,  
seet savends an hör Regentünn,  
na Steerns to kieken un na Sünn.

Mitmaal see se: „Wat is denn dat?  
Daar swemmt ja wat in 't Regenfatt!  
Ik hebb en gollen Steert daar sehn –  
dat is en Fisk, dat is keen Steen!“

De Fisk hett gollen Schuppen hatt,  
de angel sük uns Musekatt.  
Wull sük en moje Fisksopp koken,  
mit Ziepels, Wien un all so Saken.  
Se hull hum fast mit hör Poot  
un doch bi sük: „De smeckt mi good!“

De Fisk, de see: „Ach, leve Katt,  
van mi word doch dien Buuk nich satt!“

De Fisk weer bang, he wull dat nich  
un keek de Katt midden in 't Gesicht:  
„Höör lever to, ik weet noch wat:  
Bi d' Nabers steiht vör 't grote Gatt  
en Buddel Melk, de haal man her.  
Un hest du de, denn weet ik mehr.“

Do keem gries Anton, Nabers Kater,  
droog in sien Poten en groot Glas Water,  
daar settden se de Lüttfisk rin.  
Man denn: Nix as na d' Naber hen!

Na Huus torügg, Melk unner d' Arm,  
in de hör Köken weer 't lecker warm.  
Uns Katt hett 't Kookrezept utheckt  
un Anton hett de Disk updeckt.

De Katten hebbt fein Melksopp eten,  
daarover meest de Fisk vergeten  
un sünd denn in de Tuun rinsleken,

hebbt sük en moje Stee utkeken  
un tosehn, wat de Müüs woll maakt  
un of de Rosen woll noch haakt.

Laat sünd se weer na binnen komen,  
denn Anton harr en Film upnohmen  
van Riesenmüüs un Kattenfang.  
Dat mook uns Smuus-Katt düchtig bang!

Man Anton see: „Mien söte Katt!  
Dat weer en Film, wat scheelt uns dat?  
Ik bliev hüüt hier, un in mien Arm  
hest du dat seker un mooi warm.“

Denn hebbt se en Schöttel Water sopen  
un sünd daarna in 't Bedd rin krogen.  
De Fisk unnerdes swemm rum un rum  
in Anton sien Aquarium.

Tweedunker, Sünn un Morgendauen –  
Twee Maanten later höörst du 't Mauen.  
Nu hebbt se Kattenkinner kregen

- un wenn du natellst, sünd dat negen!  
Fiev weren mehr of minner swart,  
un dree van hör hebbt Striepen hatt.

Un middenmank en rosa Snuut,  
de lücht ut all de Katten rut!  
Dat weer de wittste Musekatt  
- un de hett 't geern kommodig hatt ...